

## **Nun vulissi sèntiri**

Nun vulissi sèntiri cchiù!  
Già mezzu surdu cci sugnu,  
ma lu vulissi èssiri ti tunnizzu  
accussì nun sintissi li fissarii chi dicìti,  
nun sintissi cchiù a tia, a tia, a tia,  
nun sintissi cchiù a nuddu.

Mi nni stassi tranquillu pi li fatti me  
e nun sintissi cchiù lamintèli, sparlittiu,  
sciarri, 'ngustii, 'ngiurii e rumura.  
Nun sintissi cchiù lu bottu di un fucili  
ca spara a un poviru criaturi  
ca s'addifenni lu so pezzu di pani,  
ca s'addifenni la so vita, la so libirtà.

Nun sintissi cchiù apparecchi  
'nta lu celu ca jèttanu bummi  
comu si fussiru cunfetti.  
Nun sintissi cchiù mitragliatrici.  
Nun sintissi cchiù l'ùrtimu rispìru  
di un poviru nnuccenti chi mori  
p'addifènniri li diritti di la so terra.

Nun vulissi sèntiri cchiù  
na mamma parlari lu propriu figliu,  
na figlia rimpruvirari lu propriu patri,  
nun vulissi sèntiri cchiù sciarri pi la casa,  
pi la terra, pi li sordi, pi la pruprietà.  
Nun vulissi sèntiri cchiù li grida di dulura  
di la Madonna ca chiancì pi lu propriu Figliu  
ammazzatu, misu 'neruci pi natri piccatura.

Nun vulissi sèntiri cchiù lu chiantu  
di un niunatu abbannunatu 'nta la munnizza,  
lu chiantu di 'na fimmina ca un po avìri figli,  
li grida di na mamma dispirata  
ca vidi lu propriu figliu  
arrutularisi sutta un camiu.

Nun vulissi cchiù sèntiri nenti.  
Vulissi sulu, ca tuttu chissu nun succidissi.

2015 Giuseppe Cardella